

Na osnovu člana 29. stav 1. tačka 1. i člana 30. Zakona o zaštiti i spašavanju ljudi i materijalnih dobara od prirodnih i drugih nesreća ( " Službene novine Federacije BiH ", broj 39 / 03 i 22/06) i član 14. stav 1. Zakona o nadležnostima organa vlasti Kantona Sarajevo u oblasti zaštite i spašavanja ljudi i materijalnih dobara od prirodnih i drugih nesreća ("Službene novine Kantona Sarajevo", br.39/08) i člana 103. Statuta Općine Ilijaš ("Službene novine Kantona Sarajevo" broj:7/98,09/01,17/04 i 04/08) Općinsko vijeće Ilijaš, na svojoj 9-oj sjednici održanoj 30.06.2009 godine donosi:

## **ODLUKU**

### **O ORGANIZOVANJU I FUNKCIONISANJU ZAŠTITE I SPAŠAVANJA LJUDI I MATERIJALNIH DOBARA OD PRIRODNIH I DRUGIH NESREĆA ZA PODRUČJE OPĆINE ILIJAŠ**

#### **I OSNOVNE ODREDBE**

##### **Član 1.**

Ovom Odlukom se utvrđuju organizacija i funkcionisanje sistema zaštite i spašavanja, te nadležnosti općinskih organa vlasti u odnosu na poslove zaštite i spašavanja ljudi, biljnog i životinjskog svijeta, materijalnih, kulturnih, historijskih i drugih dobara i okoliša od prirodnih nepogoda, tehničko-tehnoloških, ekoloških i drugih nesreća ili ratnih opasnosti za područje Općine Ilijaš.

##### **Član 2.**

Zaštitu i spašavanje ljudi i materijalnih dobara od prirodnih i drugih nesreća ili ratnih opasnosti na području Općine Ilijaš provode: građani, organi vlasti, privredna društva, službe zaštite i spašavanja, jedinice i povjerenici civilne zaštite u okviru svojih prava i dužnosti, a na principima saradnje, solidarnosti i uzajamnosti svih učesnika u sprječavanju, ublažavanju i otklanjanju posljedica djelovanja prirodnih i drugih nesreća.

##### **Član 3.**

Općina osigurava organizaciju jedinstvene zaštite i spašavanja na svom području, uređuje pitanja organizovanja, razvoja, pripremanja i upotrebe snaga i sredstava namjenjenih za zaštitu i spašavanje ljudi i materijalnih dobara od prirodnih i drugih nesreća.

Svi vidovi zaštite i spašavanja od prirodnih i drugih nesreća organizuju se i provode u skladu sa načelima međunarodnog humanitarnog prava i međunarodnog prava o zaštiti ljudi i materijalnih dobara od prirodnih i drugih nesreća, kao i preuzetim međunarodnim obavezama.

#### **II. NAČIN OSTVARIVANJA PRAVA I DUŽNOSTI GRAĐANA I PRAVNIH LICA U ZAŠTITI I SPAŠAVANJU**

##### **1.Prava i dužnosti građana**

##### **Član 4.**

Građani imaju pravo i dužnost učestvovanja u civilnoj zaštiti, izvršavanja obaveza davanja materijalnih sredstava i obučavanja za ličnu i uzajamnu zaštitu, te za provođenje mjera zaštite i spašavanja . Pored prava i dužnosti iz stava 1. ovog člana, građani imaju pravo i dužnost:

1. da u skladu sa zakonom i planovima zaštite i spašavanja budu raspoređeni u službe zaštite i spašavanja, štabove i jedinice civilne zaštite;
2. da podatke značajne za zaštitu i spašavanje dostavljaju najbližem operativnom centru civilne zaštite ili policijskoj upravi;
3. da daju podatke potrebne za vođenje evidencija u oblasti zaštite i spašavanja, te da u roku od 8 dana prijave promjene. Promjene se odnose na promjenu prebivališta, zaposlenja i druge podatke značajne za zaštitu i spašavanje.

##### **Član 5.**

U odnosu na zaštitu i spašavanje od prirodnih i drugih nesreća , građani imaju posebne dužnosti koje se sastoje u slijedećem:

1. da organizuju zaštitu i spašavanje što se odnosi na ličnu i uzajamnu zaštitu;
2. da učestvuju u civilnoj zaštiti;

3. da učestvuju u obavezi davanja materijalnih sredstava;
4. da se osposobljavaju za provođenje mjera lične i uzajamne zaštite i spašavanja;
5. da budu raspoređeni u jedinice, štabove i službe zaštite i spašavanja;
6. da nadležni organ obavjeste o podacima značajnim za zaštitu i spašavanje ;
7. da se odazovu pozivu nadležnog organa civilne zaštite

#### **Član 6.**

Pored dužnosti građani imaju i posebna prava u zaštiti i spašavanju, a to su:

1. pravo da traže ocjenu zdravstvene sposobnosti za učešće i obučavanje u civilnoj zaštiti;
2. pravo da dobrovoljno učestvuju u civilnoj zaštiti;
3. pravo na novčanu naknadu za učešće u civilnoj zaštiti;
4. pravo na zdravstvenu zaštitu, invalidsko i penzijsko osiguranje;
5. pravo na jednokratnu novčanu pomoć;
6. pravo na prevoz, ishranu i smještaj tokom učešća u zaštiti i spašavanju, obuci ili vježbi;
7. pravo na naknadu za uništenu ili oštećenu odjeću i obuću

## **2. Prava i dužnosti pravnih i drugih lica**

#### **Član 7.**

Privredna društva i druga pravna lica (u daljnjem tekstu: pravna lica), koja obavljaju djelatnosti iz oblasti: zdravstva, veterinarstva, vatrogastva, stambenih i komunalnih poslova, vodoprivrede, šumarstva, poljoprivrede, hemijske i potrohemijske industrije, građevinarstva, transporta, ugostiteljstva, hidrometeorologije, seizmologije, ekologije i drugih oblasti od značaja za zaštitu i spašavanje ljudi i materijalnih dobara od prirodnih i drugih nesreća dužni su organizirati i provoditi poslove zaštite i spašavanja u skladu a Zakonom o zaštiti i spašavanju, ovom Odlukom i drugim propisima i aktima nadležnih organa.

U izvršenju poslova iz stava 1. ovog člana, pravna lica provode odgovarajuće pripreme, donose i razrađuju planove, te obezbjeđuju materijalno-tehnička sredstva za provođenje mjera zaštite i spašavanja. U toku vođenja akcija zaštite i spašavanja ljudi i materijalnih dobara od prirodnih i drugih nesreća, pravna lica iz stava 1. ovog člana dužna su provoditi odluke Općinskog štaba civilne zaštite, koji rukovodi akcijama zaštite i spašavanja na području Općine.

Kada pravna lica u toku obavljanja svojih redovnih aktivnosti utvrde postojanje određene opasnosti od prirodne i druge nesreće, dužne su podatke o istoj odmah dostaviti operativnom centru civilne zaštite ili policijskoj upravi.

#### **Član 8.**

U pripremi i provođenju zaštite i spašavanja, obavezno učestvuje Općinska organizacija Crvenog križa Ilijaš i druge humanitarne organizacije i udruženja građana, koja djeluju na području općine Ilijaš. U obavljanju poslova za koje su nadležne te organizacije i udruženja dužne su da ostvaruju punu saradnju sa Službom civilne zaštite općine Ilijaš i postupaju po nalogu Općinskog štaba civilne zaštite.

Organizacije iz stava 1. ovog člana, dužne su u svojim programima rada utvrditi organizaciju, zadatke i aktivnosti kojima se obezbjeđuje učešće njihovih organizacija i članova u zaštiti i spašavanju.

#### **Član 9.**

Škole i druge ustanove koje se bave naučno-istraživačkim radom, dužne su obavještavati Službu civilne zaštite o naučnim dostignućima i davati podatke i obavještenja o svojim istraživanjima, koja su od značaja za zaštitu i spašavanje ljudi i materijalnih dobara.

#### **Član 10.**

Pravna lica ili udruženja građana koja su vlasnici telekomunikacijskih i informacijskih sistema i veza dužni su dati prioritet u korištenju tih sistema i veza Operativnom centru civilne zaštite, odnosno štabu civilne zaštite, kada štab rukovodi akcijama zaštite i spašavanja.

#### **Član 11.**

Sva pravna lica dužna su davati materijalna sredstva za potrebe civilne zaštite u skladu sa Uredbom o načinu davanja i vraćanja materijalnih sredstava uzetih za potrebe civilne zaštite ("Sl. novine FBiH", br. 23/04 i 38/06).

### **III NADLEŽNOSTI OPĆINSKIH ORGANA VLASTI**

U ostvarivanju prava i dužnosti u oblasti zaštite i spašavanja, shodno članu 29. Zakona o zaštiti i spašavanju i članova 14., 15., 16. i 17. Zakona o nadležnostima organa vlasti Kantona Sarajevo iz oblasti zaštite i spašavanja:

#### **3. Općinsko vijeće Ilijaš**

#### **Član 12.**

Općinsko vijeće Ilijaš donosi:

1. Odluku o organizovanju i funkcionisanju zaštite i spašavanja ljudi i materijalnih dobara od prirodnih i drugih nesreća za područje općine,
2. Program razvoja zaštite i spašavanja od prirodnih i drugih nesreća za područje općine,
3. Akt o osnivanju Općinskog štaba civilne zaštite;

#### **4. Općinski načelnik**

#### **Član 13.**

Općinski načelnik u oblasti zaštite i spašavanja:

1. donosi Procjenu ugroženosti od prirodnih i drugih nesreća za područje Općine;
2. predlaže Program razvoja zaštite i spašavanja od prirodnih i drugih nesreća za područje općine;
3. donosi Plan zaštite i spašavanja od prirodnih i drugih nesreća za područje općine,
4. na prijedlog Općinskog štaba civilne zaštite, proglašava nastanak prirodne i druge nesreće za područje općine i naređuje upotrebu snaga i sredstava civilne zaštite, organa uprave, službi zaštite i spašavanja, privrednih i drugih pravnih lica, te ostalih potrebnih subjekata za prevenciju, ublažavanje i otklanjanje štetnih posljedica po ljude i materijalna dobra;
5. na prijedlog Službe civilne zaštite od predstavnika općinskih službi za upravu formira Komisiju za procjenu šteta od prirodnih i drugih nesreća;
6. uređuje pitanje finansiranja zaštite i spašavanja i osigurava potrebna finansijska sredstva u budžetu Općine za potrebe zaštite i spašavanja iz nadležnosti Općine;
7. razmatra stanje priprema za zaštitu i spašavanje u Općini i donosi mjere za organizovanje, razvijanje i jačanje civilne zaštite u Općini;
8. donosi i druge potrebne propise o organizovanju i funkcionisanju civilne zaštite Općine u skladu sa Zakonom o zaštiti i spašavanju, ovom Odlukom i drugim zakonskim propisima;
9. na prijedlog Službe civilne zaštite određuje pravna lica i udruženja od kojih će se organizovati službe zaštite i spašavanja, koje će djelovati na području Općine;

#### **5. Općinski organi uprave**

#### **Član 14.**

Općinske službe i drugi organi uprave Općine, u okviru svog djelokruga, u oblasti zaštite i spašavanja:

1. organizuju, planiraju i osiguravaju provođenje preventivnih mjera zaštite vlastitog ljudstva, materijalnih sredstava i objekata koje koriste u svom radu;
2. ostvaruju stalnu suradnju i koordinaciju sa Federalnim i Kantonalnim ministarstvima i drugim organima uprave u Federaciji BiH, u provođenju preventivnih mjera zaštite i spašavanja, kao i provođenju operativnih mjera kada nastane stanje prirodne i druge nesreće na području Općine, Kantona i Federacije BiH;
3. učestvuju u izradi Procjene ugroženosti općine, Programu razvoja i Plana zaštite, u pitanjima iz oblasti za koju su osnovani i u okviru svoje redovne djelatnosti realizuju zadatke koji se za njihove oblasti utvrde u tim dokumentima;
4. provode mjere zaštite i spašavanja ljudi i materijalnih dobara iz svog područja, a naročito mjere

koje naredi Općinski štab civilne zaštite, koje se odnose na angažovanje službi zaštite i spašavanja, privrednih društava i drugih pravnih lica u zaštiti i spašavanju;

5. obavještavaju Službe civilne zaštite o podacima koji su od značaja za planiranje, organizovanje i provođenje zaštite i spašavanja ljudi i materijalnih dobara iz nadležnosti Općine te ostvaruju stalnu saradnju sa istom u rješavanju svih pitanja od značaja za planiranje, organizovanje i provođenje zaštite i spašavanja ljudi i materijalnih dobara iz nadležnosti Općine;

6. ostvaruju stalnu saradnju i pružaju stručnu pomoć Službi civilne zaštite Općine u smislu osiguranja svih potrebnih podataka iz svoje nadležnosti pri izradi Procjene ugroženosti, Programa razvoja zaštite i spašavanja, Plana zaštite i spašavanja, kao i svih drugih planskih dokumenata koji se izrađuju na nivou Općine, kao i realizovanju zadataka utvrđenih u tim programima i planovima;

7. učestvuju u izradi elaborata za izvođenje zajedničkih i samostalnih vježbi zaštite i spašavanja;

8. obavljaju i druge poslove vezane za zaštitu i spašavanje, u skladu sa Zakonom o zaštiti i spašavanju, drugim propisima i općim aktima.

## **6. Služba civilne zaštite Općine**

### **Član 15.**

Upravne, stručne i druge poslove zaštite i spašavanja iz nadležnosti Općine, vrši Služba civilne zaštite, koja ima status općinske službe za upravu.

Služba civilne zaštite Općine, u oblasti zaštite i spašavanja, obavlja slijedeće poslove:

1. organizira, priprema i prati funkcionisanje zaštite i spašavanja na području Općine;
2. izrađuje Procjenu ugroženosti za područje Općine;
3. priprema Program razvoja zaštite i spašavanja od prirodnih i drugih nesreća Općine;
4. predlaže Plan zaštite i spašavanja od prirodnih i drugih nesreća Općine;
5. prati stanje priprema za zaštitu i spašavanje i predlaže mjere za unapređenje organiziranja i osposobljavanja civilne zaštite Općine;
6. organizira, izvodi i prati realizaciju obuke građana na provođenju lične i uzajamne zaštite;
7. organizira i koordinira provođenje mjera zaštite i spašavanja, te organizira i provodi poslove zaštite od požara i vatrogastvo, predlaže program samostalnih vježbi i izrađuje elaborat za izvođenje vježbi civilne zaštite u Općini;
8. organizira općinski Operativni centar civilne zaštite i obezbjeđuje njegov rad;
9. vrši popunu ljudstvom štabova civilne zaštite, službi zaštite i spašavanja i jedinica civilne zaštite i obezbjeđuje njihovo opremanje materijalno-tehničkim sredstvima, te organizira, izvodi i prati realizaciju njihove obuke;
10. priprema propise iz oblasti zaštite i spašavanja iz nadležnosti Općine;
11. vodi propisane evidencije i vrši druge poslove zaštite i spašavanja, u skladu sa Zakonom o zaštiti i spašavanju i drugim propisima i općim aktima;
12. vrši aktiviranje Štaba civilne zaštite Općine.

### **Član 16.**

Organizacija civilne zaštite obuhvata:

1. ličnu i uzajamnu zaštitu građana;
2. mjere zaštite i spašavanja;
3. štabove civilne zaštite;
4. povjerenike civilne zaštite;
5. službe zaštite i spašavanja;
6. jedinice civilne zaštite;
7. rukovođenje i upotrebu snaga civilne zaštite.

U organizaciju civilne zaštite spada i Služba civilne zaštite Općine, koja pored drugih poslova obavlja i stručne, administrativne, tehničke i druge poslove neophodne za rad Općinskog štaba civilne zaštite, što se bliže utvrđuje Zakonom o zaštiti i spašavanju i drugim propisima.

## **7. Lična i uzajamna zaštita građana**

### **Član 17.**

Lična i uzajamna zaštita građana predstavlja najvažniji oblik pripremanja i organizovanog učešća građana u zaštiti i spašavanju. Ta zaštita se provodi u stambenim zgradama, javnim i drugim objektima, naseljima i pravnim licima. Svi radno sposobni građani općine, od 18 do 60 godina života (muškarci), odnosno od 18 do 55 godina života (žene), su dužni da se pripremaju za učešće i da učestvuju u zaštiti i spašavanju.

### **Član 18.**

Propisane mjere i postupke preventivne zaštite i druge hitne intervencije u zaštiti i spašavanju ljudi i materijalnih dobara, u okviru lične i uzajamne zaštite, građani provode svakodnevno s ciljem sprečavanja nastanka i širenja prirodne ili druge nesreće većih razmjera.

## **8. Mjere zaštite i spašavanja**

### **Član 19.**

Mjere i postupci zaštite i spašavanja sa utvrđuju planovima zaštite i spašavanja od prirodnih i drugih nesreća.

### **Član 20.**

Planovi zaštite i spašavanja mjesnih područja moraju biti usklađeni s planom zaštite Općine. Planovi se usklađuju samo u pitanjima u kojima se određuju zadaci za određene nosioce civilne zaštite.

## **9. Štabovi civilne zaštite**

### **Član 21.**

Za upravljanje akcijama zaštite i spašavanja na području Općine, te za obavljanje drugih poslova u zaštiti i spašavanju, osniva se Općinski štab civilne zaštite, kao stručno-operativni organ.

Odluku o osnivanju općinskog štaba donosi općinsko vijeće na prijedlog općinskog načelnika.

Općinski štab funkcionise u miru kada treba preventivno djelovati prije nastanka prirodne i druge nesreće, onda kada nadležni organ proglasi da je nastalo stanje prirodne i druge nesreće na području Općine, Kantona ili Federacije BiH, te za vrijeme vježbi civilne zaštite, a u ratu funkcionise stalno.

Općinski štab civilne zaštite u ostvarivanju poslova iz svoje zakonske nadležnosti ima dvije osnovne funkcije, i to:

1. provođenje vlastitih priprema za uspješno vršenje operativne funkcije iz svoje nadležnosti (pripreme, obuka i osposobljavanje) i
2. rukovođenje akcijama zaštite i spašavanja (operativna funkcija).

### **Član 22.**

Komandanta, načelnika i članove Općinskog štaba svojim rješenjem, postavlja i razriješava općinski načelnik. Općinski štab vrši poslove iz svoje nadležnosti samostalno i za svoj rad je preko općinskog načelnika odgovara općinskom vijeću.

### **Član 23.**

Pomoćnik općinskog načelnika za finansije po položaju, jeste komandant Općinskog štaba, a pomoćnik načelnika za civilnu zaštitu Općine, po položaju, jeste načelnik Općinskog štaba. Sekretar Crvenog križa općine je po funkciji član Općinskog štaba.

Za članove Općinskog štaba postavljaju se rukovodeći državni službenici iz općinskih službi, državni službenici i namještenici Službe civilne zaštite, a u skladu sa aktom o unutrašnjoj organizaciji i Općinskog štaba, kojeg donosi općinsko vijeće na prijedlog općinskog načelnika.

#### **Član 24.**

U rukovođenju akcijama zaštite i spašavanja Općinski štab civilne zaštite obavlja slijedeće poslove:

1. odlučuje o upotrebi snaga i sredstava civilne zaštite na zaštiti i spašavanju ugroženih i nastradalih ljudi i materijalnih dobara i te snage raspoređuje na ona područja koja su ugrožena;
2. nalaže provođenje odgovarajućih mjera zaštite i spašavanja i određuje snage i sredstva koje će provoditi te mjere;
3. usmjerava, koordinira i upravlja akcijama zaštite i spašavanja svih učesnika angažovanih na zaštiti i spašavanju na području Općine;
4. tokom provođenja akcije zaštite i spašavanja dužan je provoditi odluke i naređenja Federalnog i Kantonalnog štaba civilne zaštite;
5. nalaže mjesnim štabovima civilne zaštite, štabovima civilne zaštite pravnih lica u kojima su ti štabovi osnovani i službama zaštite i spašavanja da učestvuju u preduzimanju mjera i aktivnosti na zaštiti i spašavanju;
6. nalaže angažovanje snaga i sredstava civilne zaštite sa područja Općine na ugroženo područje druge općine na području Kantona;
7. u vršenju poslova iz svoje nadležnosti donosi odgovarajuće akte;
8. predlaže općinskom načelniku proglašenje stanja prirodne ili druge nesreće;
9. rješava sva pitanja koja se u toku provođenja akcije zaštite i spašavanja pojave u vezi angažovanja snaga i sredstava civilne zaštite i provođenja mjera zaštite i spašavanja i samozaštite građana.

#### **Član 25.**

U mjesnim zajednicama osnivaju se štabovi civilne zaštite kao operativno-stručni organi za rukovođenje akcijama zaštite i spašavanja svih učesnika angažiranih na zaštiti i spašavanju na tom području. Štabove mjesne zajednice formira općinski načelnik na prijedlog službe civilne zaštite.

#### **Član 26.**

Štab civilne zaštite mjesne zajednice sastoji se od: komandanta, načelnika i tri člana.

#### **Član 27.**

Komandanta, načelnika i članove Štaba civilne zaštite mjesne zajednice postavlja i razrješava savjet mjesne zajednice uz saglasnost Općinskog štaba.

Štab civilne zaštite mjesne zajednice vrši poslove iz svoje nadležnosti i za svoj je rad odgovoran Općinskom štabu civilne zaštite i savjeta mjesne zajednice.

#### **Član 28.**

Štabovi civilne zaštite u pravnim licima koja se nalaze na području Općine formiraju se u skladu sa njihovim procjenama ugroženosti.

Ako se ne osnuje štab civilne zaštite, pravna lica su dužna svojim općim aktom odrediti organ koji će rukovoditi akcijama zaštite i spašavanja.

U toku vođenja akcija zaštite i spašavanja ljudi i materijalnih dobara od prirodnih i drugih nesreća, pravna lica iz stava 1. ovog člana, dužna su provoditi odluke Općinskog štaba civilne zaštite koji rukovodi akcijama zaštite i spašavanja.

### **10. Povjerenici civilne zaštite**

#### **Član 29.**

Povjerenici civilne zaštite su organizovane snage civilne zaštite i način njihovog organizovanja i funkcionisanja, kao i njihova osnovna prava i dužnosti, odnosno mjesto i uloga u sistemu zaštite i spašavanja regulisani su Zakonom o zaštiti i spašavanju i Pravilnikom o načinu rada i funkcionisanju štabova i povjerenika civilne zaštite („Službene novine Federacije BiH“, br. 77/06 i 5/07).

### **Član 30.**

Povjerenici civilne zaštite, određuju se u naselju, dijelu naselja, stambenim zgradama, selima i zaseocima, u organima uprave i službama za upravu Općine, drugim organima i ustanovama i pravnim licima u kojima se ne osniva štab civilne zaštite. U organima uprave i drugim organima i ustanovama i službama za upravu, određuje se jedan povjerenik za svaki organ, odnosno svaku ustanovu, a ako je više organa, odnosno više ustanova smješteno u istoj zgradi, može se odrediti jedan zajednički povjerenik za tu zgradu. U većim pravnim licima može se odrediti više povjerenika, što se određuje prema vlastitoj procjeni pravnog lica, s tim što se u obzir uzima broj uposlenika, unutrašnja organizacija pravnog lica, kao i drugi uslovi bitni za određivanje broja povjerenika.

### **Član 31.**

Povjerenike postavlja i razrješava:

1. U organima uprave i drugim organima vlasti i ustanovama - rukovodilac koji rukovodi organima uprave, odnosno ustanove, a kada je više organa smješteno u istoj zgradi – sporazumno rukovodioci koji rukovode tim organima, odnosno ustanovama;
2. U pravnom licu – direktor, odnosno drugi organ određen općim aktom pravnog lica;
3. U naselju i službama za upravu Općine – općinski načelnik, na prijedlog službe civilne zaštite Općine.

### **Član 32.**

Povjerenici u organima uprave i drugim organima vlasti, ustanovama i pravnim licima vrše poslove koji se odnose na organiziranje i pripremanje mjera i aktivnosti na sudjelovanju službenika i uposlenika na provođenju lične i kolektivne zaštite i mjera zaštite i spašavanja u zgradama i objektima za koje su zaduženi.

Povjerenici u naseljima vrše poslove koji se odnose na organiziranje i poduzimanje neposrednih mjera na učešću građana u provođenju samozaštite, kao i mjera zaštite i spašavanja koje su od značaja za samozaštitu i učestvuju u svim aktivnostima civilne zaštite koje se provode u akcijama zaštite i spašavanja ljudi i materijalnih dobara na određenom području, odnosno u objektima za koje su zaduženi.

Planom zaštite i spašavanja od prirodno i drugih nesreća vrši se određivanje broja povjerenika civilne zaštite, razrada njihovih poslova i zadataka u miru, za vrijeme prirodnih nepogoda i drugih nesreća, neposrednoj ratnoj opasnosti i ratu, u skladu sa propisima iz člana 121. Zakona o zaštiti i spašavanju.

## **11. Jedinice civilne zaštite Općine**

### **Član 33.**

Jedinice civilne zaštite predstavljaju osnovnu organiziranu snagu civilne zaštite. To su posebni sastavi ljudi koji su pokretni i opremljeni odgovarajućim tehničkim i drugim sredstvima tako da mogu uspješno obavljati razne složene i druge zadatke u spašavanju ljudi i materijalnih dobara, u miru od prirodnih i drugih nesreća, a u ratu od ratnih dejstava i ratnih razaranja. Jedinice civilne zaštite su glavna organizovana snaga civilne zaštite i one se osnivaju, opremaju i osposobljavaju kao operativne snage radi neposrednog angažovanja na izvršavanju zadataka zaštite i spašavanja ljudi i materijalnih dobara od prirodnih i drugih nesreća, kao i otklanjanja posljedica nastalih djelovanjem tih nesreća. Jedinice civilne zaštite osnivaju se kao jedinice opšte i specijalizovane namjene u skladu sa odredbama Zakona o zaštiti i spašavanju i Pravilnika o organizovanju službi zaštite i spašavanja i jedinica civilne zaštite, njihovim poslovima i načinu rada („Službene novine Federacije BiH“, broj 77/06)

### **Član 34.**

Vrste, veličina i broj jedinica civilne zaštite utvrđuju se na osnovu Procjene ugroženosti po ljude i materijalna dobra koje mogu nastati od prirodnih i drugih nesreća, kao i ljudskih, materijalnih i drugih mogućnosti kojima raspolažu općine i pravna lica koja formiraju te jedinice.

Ako je u istom objektu smješteno više organa uprave, službi za upravu, ustanova i pravnih lica, mogu se formirati zajedničke jedinice opće namjene, o čemu sporazumno odlučuju nadležni organi tih organa i pravnih lica.

#### **Član 35.**

Jedinice opće namjene organizuju se, opremaju i obučavaju za izvršavanje zadataka na pružanju podrške u provođenju mjera prve medicinske pomoći, za gašenje početnih i manjih požara, zaštiti od poplava, spašavanju ugroženih iz ruševina, izgradnju skloništa i zaklona, provođenju mjera RHB zaštite, evakuaciji i zbrinjavanju ugroženih i stradalih, transportu i snabdijevanju osnovnim sredstvima za ishranu, smještaj i zdravlje ugroženog stanovništva, te zaštitu životinja. Jedinice opće namjene u općini formira općinski načelnik, a u organima uprave i ustanovama i pravnim licima rukovodioci tih organa, odnosno pravnih lica.

#### **Član 36.**

U općini Ilijaš se u mjesnim zajednicama formiraju jedinice opće namjene.

#### **Član 37.**

Jedinice civilne zaštite specijalizovane namjene formira Općina, a u skladu sa vlastitim procjenama i potrebama, u pravilu, kada snage i sredstva pravnih lica i službe zaštite i spašavanja, te jedinice civilne zaštite opće namjene nisu dovoljne za ostvarivanje efikasne zaštite i spašavanja na području Općine.

Jedinice civilne zaštite specijalizirane namjene formiraju se, pripremaju, opremaju i obučavaju radi izvršavanja složenijih i istovrsnih zadataka zaštite i spašavanja, čiji pripadnici pri vršenju tih poslova moraju imati odgovarajuće stručno znanje i koristiti odgovarajuća tehnička sredstva i opremu.

#### **Član 38.**

Poslove pripremanja, popune, opremanja i obučavanja jedinica opće namjene i specijaliziranih jedinica Općine vrši Služba civilne zaštite.

#### **Član 39.**

O formiranju specijaliziranih jedinica civilne zaštite u Općini odlučuje općinski načelnik, na prijedlog Službe civilne zaštite.

Formirane su 3 specijalizirane jedinice :

1. RHB zaštitu,
2. zaštitu od požara,
3. zaštitu i spašavanje od ruševina,

Prema vlastitim procjenama mogu se formirati i druge specijalizirane jedinice.

#### **Član 40.**

Prema ukazanoj potrebi, na zahtjev nadležnih organa, jedinice civilne zaštite Općine, mogu se angažirati na pružanju pomoći susjednim i drugim općinama.

### **12. Službe zaštite i spašavanja na području Općine**

#### **Član 41.**

Službe zaštite i spašavanja su poseban organizovani oblik civilne zaštite čija je namjena obavljanje određenih poslova koji su u neposrednij funkciji zaštite i spašavanja ljudi i materijalnih dobara od prirodnih i drugih nesreća.

Službe zaštite i spašavanja po pravilu, organizuju se u pravnim licima čija je redovna djelatnost od neposrednog značaja za zaštitu i spašavanje.

Prilikom odlučivanja o formiranju službi zaštite i spašavanja i jedinica CZ polazi se od Procjene ugroženosti Općine u kojima su utvrđene potrebe i određene društvene oblasti (privredne i društvene djelatnosti) u kojima treba formirati službe.

Službe zaštite i spašavanja mogu se formirati na četiri načina:

1. da se organizuju u pravnom licu,
2. da se cijelo pravno lice proglasi službom zaštite i spašavanja,
3. da se organizira van pravnog lica,

4. da se pravna lica koja nisu obuhvaćena odredbom člana 32. Zakona o zaštiti i spašavanju, angažuju kao ispomoć službama zaštite i spašavanja koje se formiraju na osnovu člana 122. i 124. navedenog Zakona.



#### **Član 42.**

Za formiranje službe zaštite i spašavanja u općini postupa se na sljedeći način:

1. uvidom u procjenu ugroženosti utvrđuje se koje su vrste službi zaštite i spašavanja predviđene da se formiraju;
2. općinski načelnik svojim aktom određuje pravna lica i udruženja građana u kojima će se organizovati službe zaštite i spašavanja koje će djelovati na području Općine;
3. pravna lica ili udruženja dužna su da donesu odluku ili pravilnik kojim će formirati predviđenu službu zaštite i spašavanja;
4. nakon usvajanja akata o formiranju službe zaštite i spašavanja, zaključuje se ugovor o međusobnim pravima i obavezama;

#### **Član 43.**

Službe zaštite i spašavanja vrše poslove zaštite i spašavanja po pitanjima koja proizlaze iz osnovne djelatnosti pravnog lica. Te poslove služba ostvaruje provođenjem preventivnih i operativnih mjera zaštite i spašavanja.

Preventivne mjere zaštite i spašavanja, službe zaštite i spašavanja ostvaruju provođenjem odgovarajućih mjera, postupaka i zadataka u okviru njihove redovne djelatnosti, a kojima se može uticati na spjerečavanje nastanka određenih pojava i opasnosti koje mogu izazvati prirodnu ili drugu nesreću i čijim štetnim djelovanjem mogu biti ugroženi životi i zdravlje ljudi i materijalnih dobara.

Operativne mjere zaštite i spašavanja, službe zaštite i spašavanja ostvaruju izvršavanjem odgovarajućih mjera, postupaka i zadataka iz svoga djelokruga, od momenta angažovanja na zaštiti i spašavanju do momenta kada se ocijeni da prestaje potreba za angažovanjem tih službi.

U službe iz stava 1. ovog člana, raspoređuju se zaposlenici pravnog lica u kojima se osnivaju te službe.

#### **Član 44.**

Pravna lica iz stava 1. člana 122. Zakona o zaštiti i spašavanju, koja ne organizuju službe zaštite i spašavanja, u akcijama zaštite i spašavanja imaju prava, obaveze i odgovornosti službi zaštite i spašavanja.

Funkciju službe zaštite i spašavanja može imati cijelo pravno lice ili samo njihov dio čija je djelatnost od značaja za zaštitu i spašavanje.

#### **Član 45.**

U slučaju kada ne postoje uslovi za organizovanje službi općinski načelnik, na prijedlog Službe civilne zaštite, može u skladu sa Procjenom ugroženosti formirati samostalne službe zaštite i spašavanja koje će djelovati na teritoriji Općine.

Aktom stava 1. ovog člana, utvrđuje se naziv, sjedište, zadaci, unutarinja organizacija i način rukovođenja službom, broj ljudi kojise angažiraju u službu i način popune, te materijalno - tehnička i finansijska sredstva potrebna za rad tih službi.

#### **Član 46.**

Općinski načelnik će svojim propisom bliže utvrditi uslove za organizovanje, poslove i zadatke i način rada službi.

### **13. Rukovođenje i upotreba snaga i sredstava civilne zaštite**

#### **Član 47.**

Općinski štab odlučuje o upotrebi snaga i sredstava civilne zaštite na području Općine Ilijaš. Aktiviranje Općinskog štaba u smislu stava 1. ovog člana, vrši općinski načelnik na prijedlog pomoćnika načelnika za civilnu zaštitu općine.

#### **Član 48.**

Tokom rukovođenja akcije zaštite i spašavanja štab mjesne zajednice dužan je provoditi odluke i naredbe Općinskog štaba, a Općinski štab dužan je provoditi odluke i naredbe Kantonalnog štaba civilne zaštite i odluke i naredbe Federalnog štaba civilne zaštite.

#### **Član 49.**

Jedinice i povjerenici civilne zaštite, službe civilne zaštite i spašavanja, kao i sredstva civilne zaštite, upotrebljavaju se u svim vrstama opasnosti u miru i ratu, kada ljudi i materijalna dobra budu ugroženi prirodnim i drugim nesrećama, kao i za vrijeme vježbi i drugih oblika obuke. Upotreba snaga i sredstava iz stava 1. ovog člana, na zadacima zaštite i spašavanja na području općine traje do momenta kada je završeno spašavanje ugroženih i stradalih ljudi i materijalnih dobara, odnosno kada se ocijeni da daljnju aktivnost na obavljanju tih poslova i zadataka mogu uspješno provoditi nadležni organi i pravna lica u okviru svoje redovne djelatnosti o čemu odlučuje Općinski štab.

#### **Član 50.**

U toku vršenja poslova iz svoje nadležnosti komandovanje jedinicama civilne zaštite vrše komandiri tih jedinica.

Lica raspoređena u jedinice civilne zaštite dužna su izvršavati naređenja komandira jedinice civilne zaštite u koju su raspoređena, a jedinice civilne zaštite dužne su izvršavati naređenja nadležnog štaba.

### **IV. PROGRAMIRANJE I PLANIRANJE**

#### **Član 51.**

Osnovni nosilac izrade planskih dokumenata Općine jeste Služba civilne zaštite, koja je osnovni stručni organ za oblast zaštite i spašavanja Općine.

Služba civilne zaštite usmjerava i koordinira aktivnosti, te pokreće inicijativu da se na izradi dokumenata angažiraju sve općinske službe za upravu i vodi sve aktivnosti dok se dokumenti u cjelini ne izrade.

#### **14. Procjena ugroženosti Općine od prirodnih i drugih nesreća**

#### **Član 52.**

Općinski načelnik donosi Procjenu ugroženosti Općine od prirodnih i drugih nesreća na području Općine koja služi za izradu dva planska dokumenta.

1. Program razvoja zaštite i spašavanja Općine i
2. Plan zaštite i spašavanja Općine

Za izradu Procjene ugroženosti Općine, općinski načelnik donosi Program za izradu procjene ugroženosti i imenuje interresornu radnu grupu za izradu iste.

Interresorna radna grupa treba da bude sastavljena od predstavnika općinskih službi za upravu zavisno od oblasti koje su u njihovoj nadležnosti.

#### **15. Program razvoja zaštite i spašavanja Općine**

#### **Član 53.**

Na prijedlog općinskog načelnika, općinsko vijeće donosi Program razvoja zaštite i spašavanja od prirodnih i drugih nesreća.

Program razvoja zaštite i spašavanja od prirodnih i drugih nesreća treba da sadrži:

1. Zaključke iz Procjene ugroženosti Općine;
2. Podatke o stanju organizovanosti civilne zaštite i dostignutom stepenu zaštite i spašavanja od pojedinih prirodnih i drugih nesreća;
3. Preventivne mjere zaštite i spašavanja koje će se provoditi;
4. Osnovne ciljeve, zadatke i način ostvarivanja zaštite i spašavanja sa smjernicama za organiziranje snaga i sredstava civilne zaštite, odnosno snaga zaštite i spašavanja;
5. Osnove za izradu programa obučavanja i osposobljavanja u zaštiti i spašavanju;
6. Smjernice za istraživačku i razvojnu djelatnost od značaja za zaštitu i spašavanje;
7. Pregled očekivanih troškova sa izvorima finansiranja.

Program razvoja zaštite i spašavanja određuje politiku i strategiju zaštite i spašavanja ljudi i materijalnih dobara od prirodnih i drugih nesreća na području Općine, u kojima se definišu konkretni programi, projekti i inicijative usaglašene sa utvrđenom politikom i strateškim pravcima

razvoja zaštite i spašavanja.

Ovim Programom osigurava se neprekidan proces razvoja cjelovitog i jedinstvenog sistema zaštite i spašavanja na području Općine.

Program iz stava 1. ovog člana donosi se za period od najmanje pet godina i mora biti usaglašen sa kantonalnim Programom.

Po donošenju programa isti se treba dostaviti svim nadležnim službama za upravu Općine i drugim nadležnim općinskim službama, organima ustanovama sa područja Općine.

## **16. Plan zaštite i spašavanja Općine**

### **Član 54.**

Općinski načelnik, na prijedlog Službe civilne zaštite donosi Plan zaštite i spašavanja od prirodnih i drugih nesreća za područje Općine.

Prije izrade Plana zaštite i spašavanja od prirodnih i drugih nesreća za područje Općine potrebno je da općinski načelnik donese Program rada za izradu Plana zaštite. Općinski plan mora biti usklađen sa Kantonalnim planom.

### **Član 55.**

Procjenu ugroženosti Općine i općinski Program i Plan zaštite i spašavanja izrađuje Služba civilne zaštite Općine, u saradnji sa službama za upravu Općine, zavisno od oblasti koje su u njihovoj nadležnosti.

Općinski Plan zaštite i spašavanja od prirodnih i drugih nesreća donosi općinski načelnik na prijedlog Službe civilne zaštite Općine.

Realizaciju mjera zaštite i spašavanja i drugih zadataka utvrđenih u Planu iz stava 5. ovog člana, vrše sve općinske službe za upravu i drugi organi općinske uprave, svaka u oblast za koju su osnovane, a koordinaciju aktivnosti na vršenju tih zadataka ostvaruje Služba civilne zaštite Općine.

## **V. OBUČAVANJE I OSPOSABLJAVANJE**

### **Član 56.**

Radi sticanja stručnih znanja i vještina za zaštitu i spašavanje građani su dužni obučavati se i osposobljavati, u skladu sa nastavnim planom i programom kojeg donosi direktor Federalne uprave.

Obučavanje građana za ličnu i uzajamnu zaštitu može se vršiti i putem sredstava masovnog informisanja (radio, TV, internet) i na drugi prigodan način.

Pripadnici štabova, službi zaštite i spašavanja, jedinica i povjerenici civilne zaštite dužni su obučavati se i osposobljavati za izvršenje svojih zadataka u civilnoj zaštiti.

Pored obaveze iz stava 3. ovog člana komandanti, načelnici i članovi štabova i komandiri jedinica civilne zaštite, rukovodioci službi zaštite i spašavanja i rukovaoci specijalnim materijalno – tehničkim sredstvima dužni su obučavati se na specijalističkim kursovima, koji se u pravilu, organizuju svake druge godine.

Obučavanje i osposobljavanje iz st. 2. i 3. ovog člana, vrši se po nastavnim planovima i programima civilne zaštite.

### **Član 57.**

Obučavanje i osposobljavanje štaba i jedinica civilne zaštite, službi zaštite i spašavanja i povjerenika civilne zaštite u Općini, kao i građana za ličnu i uzajamnu zaštitu, obavlja Uprava civilne zaštite Kantona, odnosno Služba civilne zaštite Općine.

### **Član 58.**

U osnovnom obrazovanju obavezno se obrađuju osnovna znanja o opasnostima od prirodnih i drugih nesreća i načinu zaštite od tih nesreća.

U srednjem i visokom obrazovanju obavezno se izučavaju znanja i vještine o zaštiti od prirodnih i drugih nesreća.

Federalna uprava, u suradnji s Federalnim ministarstvom obrazovanja, nauke, kulture i sporta i odgovarajućim organima uprave kantona nadležnim za obrazovanje, učestvuje u

utvrđivanju programskih sadržaja i fonda sati za obučavanje za zaštitu i spašavanje lica iz st. 1. i 2. ovog člana.

## VI. FINANSIRANJE I NAKNADE

### Član 59.

Finansiranje potreba po ovoj Odluci, a koja se odnosi na pripremanje, opremanje, obuku struktura civilne zaštite, shodno čl. 180. do 189. Zakona o zaštiti i spašavanju, vršit će se iz prikupljenih sredstava iz člana 180. Zakona o zaštiti i spašavanju i sredstava Budžeta Općine.

## VII. PRIJELAZNE I ZAVRŠNE ODREDBE

### Član 60.

Danom stupanja na snagu ove Odluke, prestaje da važi Odluka o organiziranju i funkcioniranju zaštite i spašavanja ljudi i materijalnih dobara od prirodnih i drugih nesreća na području Općine Ilijaš Br. 09-44/05 od 07.01.2005 god.

### Član 61.


Općina je dužna u roku od šest mjeseci izvršiti usklađivanje postojeće strukture civilne zaštite sa odredbama ove Odluke.

### Član 62.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj: 01/1-02-799-4/09

Ilijaš, 01.07.2009 godine



PREDSJEDAVAJUĆI OPĆINSKOG VIJEĆA

Petar Ilić

OBJAVLJENO U SL. NOVINAMA KANTONA SARAJEVO  
BR 20/2009 09.06.2009 god

Na osnovu člana 29. stav 1. tač. 1. i 5. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10) i čl. 55 i 104. Statuta Općine Ilijaš – prečišćeni tekst ("Službene novine Kantona Sarajevo", br. 20/09 i 46/18), Općinsko vijeće Ilijaš na svojoj 21. sjednici, održanoj dana 28.10.2022. godine donosi

## **O D L U K U**

### **o izmjeni i dopuni Odluke o organizovanju i funkcionisanju zaštite i spašavanja ljudi i materijalnih dobara od prirodnih i drugih nesreća na području općine ilijaš**

#### **Član 1.**

Ovom Odlukom vrši se izmjena i dopuna Odluke o organizovanju i funkcionisanju zaštite i spašavanja ljudi i materijalnih dobara od prirodnih i drugih nesreća na području općine Ilijaš ("Službene novine Kantona Sarajevo", broj 20/09), te glase:

"Član 12. stav (1) tačka 3. briše se", tačka 4. postaje tačka 3.

#### **Član 2.**

"Član 13. stav (1) mijenja se tako što se dodaje tačka 10. koja glasi: "Donosi akt o osnivanju Općinskog štaba civilne zaštite".

#### **Član 3.**

"Član 23. stav (1) mijenja se i glasi "Općinski načelnik jeste komandant Općinskog štaba, a pomoćnik načelnika za civilnu zaštitu Općine, po položaju, jeste načelnik Općinskog štaba. Sekretar Crvenog križa Općine je po funkciji član Općinskog štaba.

#### **Član 4.**

Ova Odluka stupa na snagu danom objavljivanja u "Službenim novinama Kantona Sarajevo".

Broj:01/1-02-2497-7/22

Datum: 28.10.2022. godine

**Predsjedavajuća**  
**Općinskog vijeća Ilijaš**  
**Alma Omerović BA nov.**

